

OLA

PULETINI A'OGA



12 IUNI 2023 ~ Lomiga 8 ~ Upega Tafailagi: www.ola888.com ~ Telefoni: 0210364322 ~ Tuatusi: ola.niupac@gmail.com ~ evaleon.books@gmail.com ~ NIUPAC Publication

Fa'atali mai Yale ia Andre Fa'aoso

O le alii o Andre Fa'aoso, 18 tausaga, ua talia mai lana talosaga e se tasi o a'oga fa'aaloogia i le lalolagi, le Ivy League Yale i Amerika.



O se sikolasipi e a'oga fua ai mo lona tusipasi muamua. Ta'utino ona faia'oga i se alii to'aga i ana meaa'oga, lea fo'i ua fua mai i se tali fiafia mo ia ma lona aiga. O Yale e lavea i le 5 pito i luga o iunivesite Amerika, ae 18 a le lalolagi, lona uiga e le faigofie le ulufale.

O Andre e nonofo ma ona matua i le aai o Te Atatu, Aukilani. Manuia le lumana'i.



LALELEI O FALEATA: Susuga i Faia'oga o le Itumalo o Faleata sa auai i le faasoa saunia e Salā Dr Saili Aukuso. O nisi o a'oga a le itumalo, sa auai faia'oga ma fanau a'oga i le su'esu'ega a le faifaasoa, i le 2019. O le tu'utu'uga, e toe fo'i atu e avatu ni mea sa maua i le su'esu'ega. E iai lenei fesilafa'iga, molimau le ata.

To'atolu faia'oga faamamaluina ia latou tautua a'oga

E to'atolu ni faia'oga Samoa ua amana'ia a latou tautua e le Tupu o Salesa i ana sauniga faamamalu masani. E aofia ai se pule a'oga ua loa lana tautua mo a'oga a Niu Sila i lea tulaga.

O le Susuga ia Faatili Iosua Esera ua silafia lava e le to'atele, aemaise i le li'o o a'oga, o le sui e to'atasi na togia i leni faamamaluga muamua a le Tupu o Salesa i leni tausaga. O susuga i faia'oga ia Sagapolutele ma MacKenzie e faapena foi, na ulua'i faitauina i tufaga faailoga o le tausaga 2022.


O le susuga i le pulea'oga ua togia nei mo le pine taualoa o le MNZM, e avea ai ma se sui mamalu i le saofa'iga a e ua faamamaluina e le malo o Niu Sila.

O e agavaa i leni pine e aofia ai i latou sa faia se tautua mo tagata Pasefika i le atunuu atoa.

O le pine e molimau ai i lana tautua a'oga o se pulea'oga ua laasia se 30 tausaga i lea tiute. E fa ni a'oga sa galue ai a o lei tofia i Sutton Park i Magele o loo tautua ai nei.

Iloga foi lona sao i le faalapopotoga o le FAGASA sa ia tauavea ai tofiga o le peresitene aoao ma le failautusi aoao mo ni tausaga se tele. O ia foi o le sui faavae o le mafutaga a pulea'oga Pasefika i Aotearoa, sa galue ai foi i le tofi peresitene.

A o lona sao tupito, o lena i gagana Pasefika ma lo latou tapu'eina ma faolaola. Avea ai polokalame taumualua ma auala e atia'e ai la tatou gagana. Ta'ua foi lona sao i le Vaiaso o le Gagana ma lona faatula'iina mai o se sauniga e tausiga.



Fa'atili Iosua Esera



Mamaitaloa Sagapolutele



Ruta MacKenzie

O le Susuga ia Mamaitaloa (Taloa) Sagapolutele na ia maua le pine taualoa QSM, ona o lana tautua a'oga i totonu o Kalaietete o loo galue ma alala ai. O le pine o le Tautua e agavaa ai se vasega o tagatanuu sa faia se tautua mo le mamalu o se nuu poo se faiganuu i soo se faiva.

O ia sa tauavaina le polokalame o le taumualua poo le a'oga i Gagana e lua i totonu o Kalaietete. I le a'oga tulagalua i Rowley sa amata ai sea taumafaiga, e le gata mo fanau a Samoa i la tatou gagana, ae faapea foi isi fanau a le Pasefika.

Sa faitauina fo'i lona sao i le faalapopotoga a le FAGASA, faapea A'oga Amata i Kalaietete, i na tausaga tauafua, e aulia mai le aso. E le itiiti i mafutaga faalenuu e iai le lotu o loo tautua ai.

O le Susuga ia Ruta Mackenzie na ia maua le

pine taualoa MNZM, ona o lana tautua mo tagata Pasefika i le faiva faia'oga. Laasia se 30 tausaga o tautua mo A'oga Amata, o se tagata faigaluega a le CORE ae o se sui matua foi o le SAASIA i lena vaitausaga umi.

O ia foi o se faia'oga faau'u a Samoa sa galue ai i Salafai a o lei tuua aiga mo Aotearoa.

Ese mai le matata o a'oga, sa faasalafa le tufa i isi foi faiva ma galuega. E iai le Afioga ia Patele Paulo Filoalii, na ia maua foi le pine o le sui mamalu o le saofa'iga (MNZM) i lana tautua o se failotu mo ni tausaga se tele.

O le tama'ita'i ia Dr Teuila Percival, o le ulua'i Samoa ua faae'atu ai i le pine aupito maualuga a Niu Sila, le QSO, i lana tautua i le galuega o le foma'i ma le tausima'i mo tagata Pasefika.

TALA A'OGA MAI SAMOA: SALĀ DR SAILI AUKUSO

Molimea i malo auā le tapua'iga a le Minisita ma le Matagaluega



SA FAATALI i se laolao e faataunuu ai le tuugatala, afai e mae'a le galuega ona avatu lea se'i molimauina e le Minisita ma le Matagaluega.

Talu ai o la'u su'esu'ega e afua mai i eleele o le nuu moni, e tauala i taiulu o le matagaluega, o i latou na maua ai le faatagaga e faataunuu ai. O lea fo'i na faiupu ai mo le toe lipoti atu pe a mae'a.

Na mae'a le galuega i le 2021, ae ona o le Koviti-19 na le saofia ai. A o lea ua maua le avanoa i le 2023, i le agalelei o le Matai Sili.

Ae mua lava mea i Matautu Sa auā le alofa le mavae o lo tatou Tamā i le lagi, ua mafai ai ona feiloa'i fiafia ma le Afioga i le Minisita, Seuula loane, e momoli atu i ai lana kopi o le galuega sa faia.

O se avanoa muamua leni ua feiloa'i atu ai i le alii minisita fou, ina ua sui foe, mai le Tofa ia Loau Keneti Sio sa mua'i faatau i ai le sāvali. Ae e le suia le agaga taufiafia masani, i le sanisani mai i faiva ua a'e, e le gata mo a'u, ae faapea tama fanau uma a Samoa i soo se vaega o le lalolagi o loo tautua ai. Sa lagona le agaga faagae'etia i le tali fiafia mai.

E faapena fo'i le lagona ina ua feiloa'i atu i le Faatonu Sili, le Afioga ia Aeau Chris Hazelman, o lē ua tu mai i le foe e fa'aaaua le galuega.

Sa femolimaua'i i la'ua i le tulaga o le aga i luma o le sa o le matagaluega, i ana fuafuaga faataoto ma polokalame, o loo sologa lelei i leni taimi. Ae pei lava o soo se atina'e, e iai lava mea e ao ona faaleleia, aemaise lava i le itupa o a'oga.

Sa maua foi ni avanoa lelei e feiloa'i atu ai i a'oga sa fai ai le su'esu'ega. O le itu lelei ona sa taloina ai faia'oga a le itumalo e auai. Sa folasia ai faaiuga o le su'esu'ega mo le silafia a le mamalu o pulea'oga ma le vasega o faia'oga. Sa faamalieina foi se lagona i le talia fiafia o sa'u faasoa.

Sa asia fo'i le laumua o le Papaigalagala, i se avanoa le 'aumaua, e faasoa ai fo'i. Talu ai o la'u su'esu'ega na amata mai i feutaga'iga ma le lunivesite, o lea fo'i e faafetaia ai le avanoa na ofoina mai. Sa feiloa'i atu ai i le sui ao o le a'oga, le Afioga ia Letuimanu'asina Dr Emma Kruse Va'ai, mo le taimi muamua, faapea nisi o ta'ita'i o le laumua e iai Tavu'i Dr Niusila Eteuati. O ia na tauala ai le vala'au. Toe feiloa'i fo'i ma nisi o 'aumea a o galue ai i Samoa, e pei o Susuga i Foma'i, Epenesa Esera, ma Tofilau Faguele. O Tofilau le tasi a'u faisu'ega.

E pei ona folasia i se lomiga a le OLA ua mavae, o la'u su'esu'ega sa taula'i tonu i le tulaga o tomai faavae o fanau ia latou leo amata. E aofia ai tomamata o le tautala manino. O le mau sa faavae ai le su'esu'ega, afai e maua le iloa e le fanau o leo o le gagana, o le a faigofie fo'i ona tautatala ma faitau manino, ma sui ai ausiga.

O lea na saunia ai se su'ega e saili ai le tulaga o loo iai le iloa o le fanau i a latou leo amata. O le igoa o le su'ega o le SEPA. E 100 le aofa'i o tamaiti sa su'eina, e fa a'oga ma pule a'oga e to'alima sa auai i le su'esu'ega.

O nisi la nei faaiuga na maua mai i le su'esu'ega:

1. Na iloa i la'u su'esu'ega le tulaga fetoa'i o le a'oina o faaleoga o fonime Samoa. O le mau tauave, e mātala a tatou leo, pei o la Aiono Dr Fanaafi, e le



Feiloa'iga fiafia a le na faia le su'esu'ega ma le Afioga a le Minisita o A'oga, i lona tauaaoina o se kopi o le galuega e pei ona tuutala ai

ese le igoa o le mata'itusi ma lona faaleoga. Sa ta'ua le faaletonu o ausiga a le fanau i le SEGRA, ma e talitonu lo'u taofi, e mafua lea i le fa'aaoga o faaleoga o fonime papalagi e faaleo ai a tatou leo.

2. Na iloa i la'u su'esu'ega le tulaga mautu o loo iai le faaleo a fanau i Samoa i tausaga amata i lona aoao tetele, peita'i na iloa le fai ifo i le tausaga 7. E tasi le a'oga e tagatasi ausiga, lona uiga e tali tutusa le fe'a'ei i luga a tamaiti, a o isi a'oga e fe'a'ei sina pasene, ae le faapena le to'atele. O la'u la faauigaga, e mafua i le fetoa'i i auala o loo fa'aaoga e faia'oga poo se a'oga fo'i.

3. Na atagia i ausiga le tulaga o le si'osi'omaga o fanau i aiga. Ft. o se tasi a'oga e lata i le taulaga, e tutuli fanau e faatau oloa i Apia. E faaleiloga ausiga ia i latou i le tausaga 7, lona uiga o i latou nei o loo tutuli e faatau oloa, e le to'a'aga nisi i le a'oga. O le a'oga tuma'oti na te ave le faamuamua i le gagana Samoa, o lena foi sa iloga ausiga a le fanau. E iai fo'i fanau e atamamai lava latou, a o fanau fo'i na e lelei galuega a o latou matua, o nisi o faia'oga pe galulue fo'i i le malo.

4. Na iloa i la'u su'esu'ega, e lei matuā aafia Samoa i le tasi suiga ua aliali mai i Niu Sila, i le faaleoga o a tatou leo vaueli. O leni faafitauli ua feagai nei ma fanau i fafo atu o Samoa. O lona uiga, o loo mausali pea le si'osi'omaga fanua, e faumalo ai le leo Samoa i Samoa, ma ta'aina ai le fanau i ona itu lelei.

Sa ou ta'ua le Su'ega Laititi lona 2 – Tulaga o le leo i se upu – Phoneme Isolation. E su'e ai le malamalama lelei o tamaiti i leo i totonu o se upu.

Pe tu le leo i le amataga o le upu, e iloa lava e le tamaititi lona faaleoga. Faata'ita'iga, o le leo /a/ i le upu aso, i le fuaiupu, O le a le aso leni? Pe i le fuaiupu, Ua iai ni aso o le fale? Mo le tamaititi ua masani ia tatou leo vaueli, na te iloa lelei le eseese o le lua.

5. Sa ou ta'ua se tulaga faaluafesasi i leo o le alefapeta sa tusia e misionare, i le le ogatusa o leo ma igoa o ata. Faata'ita'iga, fai mai le Pi Faitau – 'a 'ato, 'e 'elefane, 'o 'ofu. Lona uiga, ua aumai leo o vaueli Peretania e fau ai le tatou alefapeta. O vaueli Samoa lava ia e le ma'ai (e lē o se leo ta'e), e le pei o na o le gagana Peretania, lena e maua i upu e iai le afi, asu, esi, ipu, uso.

6. Na faamaonia fo'i i la'u sailiga le malosi o le pule a le aganuu ma le faa-Samoa i ausiga manuia a fanau. O faia'oga ma pulea'oga o ni totino o le aganuu ma le lotu, e faamoemoe i ai fanau ma aiga ia latou faaiuga e fai. Ae faamoemoe foi latou i isi pule i luga a'e.

O le tele o vaega e fia faaleleia i totonu o a'oga e faamoemoe i le faasoa tautupe a aiga, pe i le ata lapo'a, le tamaoaiga o le atunuu.

O nisi ia o mea na maua i le su'esu'ega, ua folasia manino, tuuina atu ma le agaga maulalo. O le tatalo, ia aogā i le atina'e lautele o a'oga, e pei o aga ma faamoemoega o soo se su'esu'ega.

Mulia'i, e toe faaopopo le faafetai i susuga i pulea'oga ma a'oga e fa sa auai, aemaise o le fanau sa faisao.

Faafetai Samoa mo le tapua'iga. Faafetai faapitoa i uo ma aiga sa agalelei. Soifua.

TALA A'OGA I AOTEAROA

Malilie faia'oga i le ofo a le malo i totogi



O nisi o sui o iuni e lua a faia'oga, le NZEI ma le PPTA auai faatasi e faailoa la latou tete'e i le malo i o latou totogi

Ua 'autasi faia'oga tulagalua e talia le ofo a le malo i totogi, ma ua taofia ai ni fuafuaga a le NZEI mo nisi solo tete'e e pei ona fuafuaina.

I le ofo fou lenei a le matagaluega, e aofia ai se tupe e \$4500 totogi atoa atu i le faia'oga.

E fa'aopoopo i lena le siitaga e \$4000 poo le 6 pasene, i le masina fou. O le tuutuuga, afai e maualuga le \$4000 i le 6 pasene o lena e fa'aoga, e fuafua lava i le na e maualuga i le isi.

I le tausaga fou, 2024, o le a toe si'i ai totogi i le 3 pasene faaopoopo ia lulai, ma faapea foi ona toe faaopoopo le isi siitaga ia Tesema, mai le 1.8 e aulia le 6.5 pasene. I le ofo tuai, e 11 i le 14 pasene e siitia ai totogi i totonu o le tolu tausaga.

O suiga lelei mo faia'oga i le ofo fou e aofia ai le taimi, lea ua lua tausaga e tamau ai.

O lenei foi ofo o le a siitia ai totogi o faia'oga e ulufale i le faiva i le \$60,735, amata i le 2024. Ua sili atu lea i le ofo tuai e \$58,505.

I lenei la faatulagaga o loo ua pa'ia ai le \$100,000 e avea ma tumutumu o le tapula'a o totogi o faia'oga.

A mae'a le 2024, ona toe tilotilo foi lea i se isi suiga poo suiga i tapulaa o totogi.

O se tasi o vaega o le ofo e aofia ai le talosaga a faia'oga mo le totogia o lesitala faia'oga e \$710. O lea foi ua talia, e ui sa lavea ai i le ofo tuai a le malo. O se tasi lea o mataupu sa iloga le iēina e iuni e lua, o se to'a i le to'atele o faia'oga o loo fia

galulue. Ae sa ta'ua e se faia'oga, e le o manino pe lavea ai i latou o loo ua le toe galulue ae ua uma aso o a latou lesitala faigaluega.

A o alo atu sui o le NZEI e toe amata le galuega a ua fa'aalia le te'ena e le iuni a faia'oga o le PPTA o le ofo mo latou. O le mafua'aga, 'e le lava.' O lona uiga e fa'aauau pea fuafuaga mo solo tete'e ua fuafuaina.

I le ofo lenei a le malo e aofia ai se \$4500 e totogi atoa atu i le faia'oga, atoa ma ni siitaga se tolu a o lei aulia Tesema 2024. O nei siitaga e i le va o le 11 ma le 15.5 pasene.

O le ofo lenei e lua tausaga e tamau ai, e ese mai le ofo tuai e tolu tausaga.

O atugaluga sa faaleo e ta'ita'i o le PPTA e iai lena i le le ogatusa ma le tau o le soifuaga, le umi (lua tausaga) e lei iai se siitaga mo ana faia'oga.

Na fa'aalia se lagona faanoanoa i le minisita ma ta'ita'i o le matagaluega, a o talia se faaiuga a le iuni pe fa'aauau pea la latou tete'e.

O le vaega A'oga Amata sa latou talia le ofo a le malo i o latou totogi. O le ofo lata mai lea o le a si'i ai totogi i le va o le 11.1 ma le 13.9 pasene mo sui auai o le iuni. I le pito i luga i latou o le a maua le siitaga e \$10,000 faaopoopo, mai le \$90,000 i le \$100,000 ia Tesema 2024.

E lavea i totonu o le ofo le faaopoopoga o livi poo aso ma'i i le 15 aso atoatoa, atoa fo'i ma se alauni mo faia'oga e a'oa'oina a latou aganuu.

Fulitua Rangitoto i tusipasi NCEA

Ua tonu i le pulega a Rangitoto e fai sana lava tusipasi mo le Tausaga 11, amata i le tausaga fou. Lona uiga, o le a le toe fa'aogaina le tusipasi a le NCEA e pei ona sau a'i i tausaga ua tuana'i.

O le mafua'aga e pei ona saunoa le pule, Patrick Gale, e le o lelei ona faata'oto suiga e pei ona folasia e le malo. Faapea mai Gale, o nei fuafuaga e maua ai le le mautonu ma aafia ai ausiga a fanau.

E faatatau lana tala i suiga ua faaofia e su'e ai le Literasi o se vaega o mataupu e su'eina.

O suiga nei e faaofi ai le Literasi i le Fola 1 i le 2024, Fola 2 i le 2026, ma le Fola 3 i le 2027.

Ae na saunoa le Minisita o A'oga, o nei suiga o le a maua ai le tali i le tulaga faaletonu o ausiga i mataupu faavae (core subjects), e iai le Numera ma Saienisi. E talitonu le malo e mafua le faaletonu ona o tomai faavae i le faitau, tusitusi ma le malamalama.

O le tasi a'oga ua sauni e fai lana lava tusipasi o St Cuthbert. Lea ua faaluaina e Rangitoto.

Le lava tamaiti a'afia ai galuega Vitoria

Ona o le le lava o tamaiti a'oga, o le pogai lea o le fuafuaga a le Iunivesite o Vitoria e faamalolo se vaega o lana 'aufaigaluega.

Pe a ma se 260 le aofa'i o i latou e ono leiloloa galuega i lenei fuafuaga. E iai faia'oga e 100 ma ona tupu, atoa ma le 'aufaigaluega lagolago i potua'oga ma le ofisa, e aulia lava le 150.

Saunoa le pule, Nic Smith, e tuua'iina le malo i lana faasoa faalelava. I le taimi nei o loo gaoioi le a'oga i se tala o le tupe e to'ese. I sana ripoti lata mai, e \$33 miliona ua valo'ia e o'o i ai lena toese i lenei lava tausaga.

E le na o Vitoria ae faapea foi isi iunivesite e pei o Massey, Canterbury, Otago, Waikato ma le AUT o loo galulue i tupe to'ese.

O loo fai ifo pea le numera o fanau a'oga, 5000 i le tausaga talu ai, ae lata i le 6000 i le tausaga nei. Fa'aopoopo i ai ma le pa'u o le numera o fanau mai fafo, o se ata lea o le tulaga faigata o loo feagai ma iunivesite i lenei vaitau.



Te Ope Whakaora

O le vaimasina lenei o le sailiga fesoasoani a le Salvation Army ia Niu Sila, e asia ai lou lumafale pe logoina foi lau faauta i luga o auala o fesooota'iga faaneionapo. O le a se foa'i tupe e te mafaia e lagolago ai ana fuafuaga, e talia ma le faafetai. Faafesoota'i le telefoni 0800 53 00 00, pe asiasi i le Upega Tafa'ilagi salvationarmy.org.nz. Faafetai.

Matua o le Vaiaso

Avea oe ma lena suiga e te fia vaai i ai i lenei lalolagi.

— Mahatma Gandhi

TALA A'OGA NIU SILA:

E le lava faia'oga e lagolagoina folafolaga a le malo mo A'oga Amata

E le lava faia'oga e lagolagoina le folafolaga a le malo mo A'oga Amata. O se fa'aaliga lea mai taiulu o lenei matafaioi.

O le pule faatonu o A'oga Amata a Niu Sila, Kathy Wolfe, na faaali sona finagalo e faatatau i lenei ofo a le malo o se mea lelei, peita'i e le o iloga sana tali atu i le tulaga o le lava o faia'oga e tilivaina.

E pei ona silafia le folafolaga a le malo e ala i le Tala o le Tupe, lea na togia ai se vaegatupe tele e a'o'oga fua ai fanau, 20 itula mo e ua aulia le lua tausaga.

Ae na saunoa Wolfe, e to'atele matua ua latou apoina le ofo, ae o le lave ua leai ni avanoa i ofoga. Ma e toe fo'i lava i le pogai o le faatifaui, o le lē lava o faia'oga.

O lona uiga, e to'atele fanau o loo tatalo mo ni avanoa i le lisi faatalitali.

Sa ta'ua e Wolfe le tulaga su'egata o faia'oga, e iloa lea i le mau faasalalauga o avanoa ae leai nisi e talosaga mai.

Lea foi ua faaleleia nisi vaega o mana'oga o A'oga Amata, e aofia ai totogi o faia'oga, ae o le lave, e leai ni faia'oga, lona uiga e toe fo'i lava le lu'i i le malo e tusa i lea tulaga.



I le taimi nei o loo maua le toomaga i faia'oga mai fafo ae manatu foi i le tatau ona ave le faamuamua ia tatou faia'oga fanua. E iai i latou sa galulue a ua sui galuega, e mafai ona toe liliu mai e toe fa'aaau le tautua.

Sa ta'ua foi e le Minisita ni taumafaiga a le malo e iai le ofoina o ni sikolasipi e a'o'oga ai talavou o loo

fia galulue i lenei faiva.

O le tasi faafitauli, o faatosina mai le setete o Vitoria i Ausetalia, ua latou ofoina mai ai ni faamanuiaga lelei mo faia'oga Niu Sila e masi'i atu e faigaluega. E \$54 i le itula i le totogi amata e \$67,000 (\$74,000 tupe Niu Sila). O se lu'itau malosi lea i le faia'oga o loo fia galue pea i Niu Sila

Su'esu'e le Minisita o A'oga e le Komiti a le Palemene

O se mea e le masani ai le avatua o se Minisita a le malo e su'esu'eina e se komiti faapalemene. A o lea ua tupu i le Minisita o A'oga a le malo o Niu Sila.

O le Afioga a le Minisita, Jan Tinetti (ata), o loo tuua'ia i lona ta'ita'iina sese o le Palemene ma le iloa o lana mea o loo fai.

O le 'auga o le tuua'iga e faapea na ia le toe faasa'oina se faamatalaga sese i sana lauga sa faia i totonu o le Maota.

O tulaga masani o mataupu faapea, e tatau i se faipule poo se minisita ona faia se faasa'oga a o lei mae'a le aso faigaluega.

E toe fo'i le talanoaga i tua ia Fepuari ina ua fesiligia le Minisita e le Fofoga Fetalai pe sa iai sana na fai i le pepa o faamatalaga o fanau auai i a'oga. Na tali le Minisita, sa iai ae o le faaiuga a le matagaluega o A'oga.

Ina ua faia le faasa'oga mulimuli ane e le Minisita, na ia ta'ua ai le logoina o ia e lana 'aufaigaluega ina ua mae'a le fono.

Sa ta'ua foi e le Minisita na te le iloa e tatau ona faasa'o lana tala na fai i luma o le palemene. Ana le tusi atu le Fofoga Fetalai ia te ia, o lona na ia iloa ai e tatau ona faasa'o.

Saunoa le Fofoga Fetalai, e moni e iai mea sese e tutupu, ae e taua tele le vave faasa'oina ina ia 'aua ona atagia atu i fafo a mea ua ta'ita'iina sese le faautaga a le Maota. O le tiute lea o soo se sui usufono aemaise lava i Minisita a le Malo.



I le vaiaso na se'i mavae na faamalolo ai se tasi Minisita e le palemia ona o se tuua'iga o le le faamaoni i ana upu. Sa ta'utino i ana siea (shares) i se pisinisi ua uma ona faatau ese, ae iloa ane o loo umia pea e ia. Tusa i ripoti, e faasefululua ona fautuaina le



Minisita i le mataupu ae e lei gau'ia lava. O le umia o ni siea o se pisinisi e se faipule, o se tapu lea i tulafono

faapalemene. Ina ua fesiligia le palemia i sona finagalo, o lana tali, na te le taliaina sea amio.

Tusi ofoina atu e le Evaleon-Niupac



Faasoa o le Vaiaso:

E iai le fa'aumi o le Gagana a Samoa

SA TATOU faailogaina le Vaiaso o le Gagana 2023 i le autu, Mitamita i lau gagana, maua'a lou faasinomaga. Ua manino fo'i le agaga o le autu e pei ona folasia manino e i latou sa tapenaina.

E manatua e le faasoa le solo ta'uta'ua a le alii fatusolo o Lemalu Tate Simi i le gagana. A'o le gagana e le ina leo i se Samoa ae ina iloa ai mea taua o loo affi i totonu.

Fai mai se upu, o le gagana o le leo lea o se aganuu. Pe faapea fo'i e le mavavaea na mea e lua—aganuu ma le gagana e tasi lava. E faaali atu e le gagana le agaga o se aganuu, aemaise o ni mea lelei e iloa ai.

O le tatou gagana e le na o se gagana e talanoa ma fesoota'i ai, a o se gagana e fa'aali ai uiga silisili e tasi ai le va fealoaloa'i o tagata. La lea, a faaumi le fuiupu gagana Samoa, e mafai ona faapea 'o le gagana fa'aaloalo a Samoa,' auā i soo se fa'aogaga o le tatou gagana, e o'o lava i tausuga, e maua lava i ai le upu 'fa'aaloalo' i le ogatotonu.

E mafua ai se taofi o le faasoa, e iloa tatou i le fa'aaloalo—gagana pe leai fo'i. Tusa lava pe le tautatala le fanau i le gagana Samoa, pe fetoi, ae a maua'a i le fa'aaloalo, e talitonu o se amataga lelei lea i le iloa o lo latou faasinomaga. Auā o le gagana e le tuli ina faaleo i upu, a o taga ma le amio fo'i. Avea ma se faata'ita'iga ni mataupu taufaamasinoga e asiasi i ai, ia tatou talavou solitulafono. E masau le tautala faaSamoa, ae matau atu ua tu faafia i luma o le faamasino. Lona uiga o loo misilē le fe'au, ia iloa fa'aaloalo i isi e te le tu ai i luma o le faamasino ma ta'uvalea ai lou atunuu.

O loo finauina le mataupu po ua tatau ona vaoia le toe umia e fanau o telefoni i lotoa a'oga. Ua malosi le itu e lagolagoina le faia o se tapu.

Omia i le va o le papa ma le mea faigata

O se faaliliuga faigofie lea a le faasoa o le muagagana Peretania, between a rock and a hard place. Ae faatatau i se tulaga faigata e feagai ma se tagata, tula'i mai ai le le mautonu. Pe fetau fo'i i ai le tatou upu, lumafale i le moana ae tua i le papa.

O soo se faia'oga lava, e malamalama i lea tulaga, aemaise i latou e iai alo a'o'oga, auā e le ese so latou lagona mai le lautele o matua. O le naunauga i matua ia solo lelei a'oga a le fanau, ia matalatala lotoā a'oga i aso uma e ulufale ai fanau mo le a'oa'oina.

E faapena fo'i faia'oga, auā o la latou inivesi i fanau a'oga e iloa i ausiga manuia i le faaiuga o le tausaga. O i latou lava o matua o fanau pe a ulufale i lotoa a'oga.

O lea ua fetau ai le muagagana sa ta'ua, fai o le alofa i le fanau, ae iai fo'i tiute i aiga, e ala i se totogi talafeagai ma le galuega o loo fai. I lenei vaitau o le taugata o oloa, ua lagona e i tatou uma le fe'oma'i i le va lea. O faia'oga, matua, fanau, pulega, e o'o lava i le malo.

Ua iloa le sootaga malosi o le amio faasaua o isi fanau i isi, ma le telefoni. E ala ona faama'ite ni fusuaga ina ia pu'e i telefoni ma saili ai le fia ta'uta'ua o se tama poo se teine a'oga (E le aofia matagi i lenei faaupuga).

O le mala o loo feagai nei ma faleoloa a Niu Sila, i talavou e osofa'ia ma gaoia oloa, e fesoota'i i lea agaga o le fia fa'aaliali i luga o TV ma alaata faitele. E leai fo'i se meafaigaluega sili ona fa'aoga sese ai le gagana e tusa ma le telefoni feavea'i.

Atonu o le fe'au mo le fanau, faamanatu Lemalu, e le o le mitamita i le sosolo o le tautala, a ia sili ona mitamita i se gagana e taulagia ai le fa'aaloalo ma uiga silisili na e viia ma ta'uleleia ai. Pei foi o le mau a Tupua, e taua le gagana ona o le fe'au o loo ona molia. A leai le fe'au, ua na o se gagana.

I nei tupulaga ua 'augatā malo ma nuu e toe talanoa sa'oloto i nei upu e iai le fa'aaloalo, alofa, faato'ese. Ua talanoa i le malosi ma le aia tatau. O loo ua atagia malosi lea agaga i talanoaga o nei aso.

Toe fo'i i le fesili pe o le a le sootaga o le gagana ma le amio faatautala a talavou, o le tali, atonu e mafua i le le a'oa'oina o nei aga i potua'oga. Atonu e mafua i le le lava ona faata'ita'ia o nei aga ia i latou.

Atonu fo'i ua tele mea faalavelave e iai le telefoni. Ae e le o le telefoni a o lona fa'aogaga tatau. Auā i le tama ma le teine ua maua'a i le fa'aaloalo, alofa, faamagalo, ma fe'au taua na, fai mai ai le Tusi, na te iloa fa'aoga tatau lana gagana i taimi uma.

O le su'esu'ega a le alii faia'oga su'esu'e ia Muliagatele Dr Vavao Fetui, na ia tilotilo ai i lenei autu ma lona lotolotoi ai i tu ma agaifanua a Samoa. Na te lagolagoina ai le mau i le mausali o le fa'aaloalo i soo se tafa o lana aganuu. Ae e iai fo'i vaega ua matauina ai le solo o le falute.

E te maua lana galuega i luga o le tatou upega www.ola888.com (Su'esu'ega).

O nisi o leo e le o lagonaina i lenei finauga o lena o le fanau. Se'i vaganā ua fesiligia nisi ona manino mai lea o ni o latou atugaluga.

Mai i a'oga amata e aulia le kolisi, e 800,000 ma ona tupu fanau o loo 'omia i lenei finauga.

O nisi o fanau ua lagona le le mautonu ia latou miti, ona o le tulaga faaluafesasi o loo faamalumu ifo, e pei o se aoto'a e le matafi.

Talanoa i totogi lelei mo faia'oga, e le faatusalia le tasi malo i le isi, auā o le totogi mauuluga i le lalolagi e tatau ona fua i le tau o le soifuaga o na malo. Se'i vagana malo pei o Finelani o la latou faamuamua o faia'oga, e le gata i totogi ae o le tulaga amana'ia.

La lea e le o le numera e taua, auā afai e lavatia e le totogi le tau o le soifuaga, le totogi o le fale, pili masani ma mana'oga pito taua, se tupe e teu mo a'oga a le fanau, o lena le tapulaa mo'omia.

Ae i lenei vaitau lē mautonu, e fausia le fautuaga a e popoto mai anamua: ia fa'asoasoa tatau, ia lava papale i lagona sasao a'e o le ita ma le tautuu'a'i. E tasi lo tatou va'a o loo folau ai, la lea ia maua'a le faapalepale, e oso pea le la a le Alii.

Otootoga

Ua tonu i le luni NZEI ma lona pulega e taofia loa soo se fuafuaga tete'e, ina ua talia le ofo a le malo i o latou totogi. Na fa'aalia ni finagalo o faalapopotoga a matua e viia sea faaiuga. Na saunoa se sui, o lenei autasiga o le a tafia ese ai lagona popole o matua, ae sagai atu ai i se lumana'i mautinoa mo fanau.

Na tuua'ia se faia'oga i lona tuleia o se tama a'oga a o ti'eti'e i se hoverboard. Na o'o atu le mataupu i le Fono a Faia'oga peita'i na te'ena e le faia'oga le tuua'iga. Talu ai le leai o ni molimau maumaututu, o lea na faasao ai le faia'oga mai se faasalaga. Ua le toe galue le faia'oga i le a'oga lea, ua sui lana a'oga.

Na molia i le Fono se faia'oga ua mu ai se tamaitiiti, 15 masina, i lana iputi vevela. Ua faamaonia ai lona faatamala tele i le saogalemu o le fanau. Na tili i le falema'i ma togafitia ai le tama i ni mu i ona mata ma lima. Na alu le faia'oga i se mea ae tuu lana iputi vevela, lea na aapa i ai le tama tupu ai le faalavelave.

I luma o le faamasino i Aukilani le alii o Xavier Valent, tama a'oga tuai a Auckland Grammar, molia ma faamaonia ona moliaga i le umia ma tufatufa atu le aisa ma le P i totonu o Aukilani. E soloatoa lona faasalaga. Na saunoa le faamasino, e iai i latou e tatau ona toe amata lelei le olaga, i le falea'oga o le falepuipui.

Na molia se faia'oga i lona avatua o lana telefoni e vili ai se tamaitiiti i lona tamā o loo nofosala i le toese. Na su'esu'e e le Fono ma iloa ai o se lape faalegaluega sa le tatau ona tupu. Na faato'ese le faia'oga i le Fono ae faapea le a'oga. O lana tala, e toe mau manatu ane a ua tuai.

E mua i luma le va'a o Otako (Otago) i le faatulagaga o pasi mauuluga o le NCEA i le tausaga talu ai, 2022. I le Fola 1, e 78.9 pasene o ana tamaiti e pasi. I le Fola 2, e 85.4 pasene e pasi, ma le Fola 3, e 77.2 pasene. Lona uiga e mua uma i fola e tolu. E faapena fo'i i le su'ega o le UE, e 63.7 pasene o fanau na ausia le tapulaa.

Mai le valu iunivesite a Niu Sila, e lima o loo fesaga'i ma ni faafitauli tau galuega, e mafua i le tulaga o le seleni. O a'oga nei o loo gaoioi i le pito mumu o le api, ta'ua a le 'ausu'etusi. O lea ua mafua ai suiga o'oo'o e iai le faamaloloina o le 'aufaigaluega.

Asiasi fo'i i le tatou upega

www.ola888.com mo se fa'aopoopoga i lau faitau

Ne'i Mea Ane ua Galo

Faitaulia Faato'esega i lo tatou tala



FEOLOOLO NI tagata Niu Sila na fa'aali sa latou faameo i le faato'esega a lo latou malo ia Samoa, e pei ona faaleoina e Helen Clark ma lana faigamalo i le 2002. Ae le o Niu Sila uma. Ui o lea o le tiute lea o ta'ita'i, o le fai o faaiuga e tatau ona fai. Pe fai ona o le musumusuga a le

lotofuatiaifo pe fai ona o le fa'aaoga tatau o le avanoa e faamau ai sou sao i le talafaasolo. E talitonu o mea uma na e lua, ae faapoopo i ai ma le lototele e fai ai.

E auilili le saunoaga a le palemia Niu Sila, faia i Apia i le faamanatuga o le 40 o Samoa tuto'atasi. Na avea ai le faama'i o le 1918 (Faama'i Oti) ma le faalavelave o le 1929 (Aso Toona'i Pogisa) ma 'auga o lana lauga faato'ese. O ni mataupu tu'ua nei e pei ona faapuina ai e le palemia, ua loa tausaga o taofia pea mai le faamae'aina.

Sa ta'ua i le lauga le o'o mai o pulega faakolone i le Pasefika ma afaina ai vaega uma o le olaga masani e le gata i tagata Maori ae faapea Samoa ma nuu uma o le Pasefika. Sa ta'ua le su'emalo o Samoa na mafua ai ona avea ma ulua'i malo tuto'atasi i le Pasefika atoa. Sa ta'ua e le palemia le mafana o le faigauo a malo e lua, e pei ona molimau le lotolotoi ai o Samoa ma fai lona leo i upufai o le lalolagi; aemaise i mataupu na tau le filemu, le tau ma le faasaoina o le si'osi'omaga.



~ IUNI 1 - 12 ~

- 1
1962 Faailoga Tuto'atasi o Samoa
1970 Fai meaalofa mai Amerika i se fasi ma'a mai le masina
2006 Pasi tulafono faavae ai iunivesite aoao
- 2
1924 Aso Gafua. Ulua'i taaloga lakapi va o Apia ma Pago Pago. Malo Apia 33-0
2001 Malo Samoa ia Toga Apia Park 20-18
- 3
1970 Malo Vaalele o le Sami tuuga fautasi
2000 Malo Samoa ia Fiti Apia Park 31-17
2002 Faaleo e Helen Clark faatoesega a le malo Niu Sila ona o pulega faaletonu tuana'i
- 4
1924 Aso soifua Tofilau Eti Alesana
1925 Tuua e Tupua Tamasese toese i Aukilani
- 5
1934 Tatala faleoloa o PP (Burns Philp) i Apia Tau o le galuega 70 afe pauni
1994 Malo Samoa ia Toga Apia Park 32-19
2015 Malu Jerry Collins i Iona 35
- 6
1876 Lomia le tusiupu a Siosaia Parate teuteuga Iona 2

- 7
1962 Tuumalo Luafatasaga Kalapu
1986 Mu le falemeli i Apia
- 8
1899 Tofia Dr Solf avea ma peresitene o le fononua a Konesula
- 9
1915 Toe asiasi mai Siosaia Palauni i Samoa o le Peresitene o le Metotisi Ausetalesia
2001 Malo Samoa ia Fiti i Suva 36-27
- 10
1899 Soloia le faiga faatupu ae sui i le malo faakonesula. Dr Solf o le faatonu sili
1985 Amata tautua MV Lady Samoa 1
- 11
1836 Usugafono Ionalua LMS faia i Apia
1927 Feiloa'i le sui o Niu Sila Nosworthy ma ta'ita'i o le Mau
2004 Malo Fiti ia Samoa i Suva 29-3
- 12
1913 Lafoa'i tulaga o le Alii Sili
1993 Malo Samoa ia Sikotilani Apia 28-11
2004 Malo Puga Lalau paga mamafa Pasefika i Saute ia Alapati Kitione

Sa ta'ua foi le sao o tagata Samoa ua avea Niu Sila ma nuu fou, i soo se vaega o lona atina'e. E le na o taaloga, a o isi foi vaega o auunaga i le malo ma tagata. Ua iai ni faipule i le palemene, o ni faamasino, ni taiulu i mata-galuega ma galuega, o ni tufuga matafaioi eseese, o e iai taleni iloga ua iloa ai Niu Sila i le lalolagi.

Mai le 1914 e aulia le 2002 ua atoa ai le 88 tausaga, lea na faato'a faamau aloa'ia ai le vaega tuai o le tala ia Niu Sila ma Samoa, ina ua avea lona palemia ma se agaga lelei e tusia le itulau faaiu: faato'esega.

Talitonu ua sili atu le felata'i o le mafutaga i malo e lua talu lea faatinoga o le lototele e pei ona faia e Niu Sila e ala i le palemia o lea taimi, Helen Clark.

Lea foi sa faia e Jacinda Ardern i osofa'iga faavaveao a leoleo i tagata Pasefika.

Tele malo o le lalolagi latou te le o mafai ona uia sea tulaga ona o mafuaaga ua silafia lava. O nei malo na atia'e i faavae mai fafo ma faiga faailogalanu. E manatu ai o le faato'esega o se ta'utinoga lava lea o le mea moni, o se mea e faigata ona fa'aali.

Peita'i o loo molimauina pea le pua'iina atu o lea faata'ita'iga lelei i isi foi malo tua'oi. Pei o Ausetalia, lata mai nei se faamaulaloga a lana palemia i tagata Aporiti. O fanau na aveese faamalosi mai o latou tina ma aiga, ua loa tausaga e leai se upu a le malo i ai. Lea faato'a tupu i se faigamalo ta'ita'ia e le Leipa. O se mea leni sa le mafai ona fai e isi ona ta'ita'i na muamua.

Ta'ua e le palemia Ausetalia leni i sana faatusa i le moli e faasusu atu i mea moni ua loa tausaga o 'alo ai le tilotilo a le atunuu.

Tele nisi ausiga mata'ina mo Helen Clark e ala i faaiuga faigata, ae faapea foi Jacinda Ardern, i le tau vasagaina o le tua'oi o finagalo o le 'aupalota ma le tonu aupito lelei, ae mautinoa e aofia ai ma ausiga o le lotomaulalo e le mauagofie i upufai o ni malo, poo ni ta'ita'i o ni pulega temokarasi.

O le agaga o le faasoa, ua atoa ai le tino o le tala i le faato'esega sa faia, e pine lena vaega muamua o le tala i le faigauo a Samoa ma Niu Sila. Faamagalo foi Samoa i le upu a le fatusolo Egelani, sese o le mea a le tagata, a o le faamagalo o le mea a le Atua.

Ata: I luga le tama'ita'i palemia, Helen Clark, i lalo o le taaloga a Samoa ma Sikotilani 1993.

UILI FAU UPU

Saili tali o fesili o lo’o i lalo. Pule oe pe sipela i luma (clockwise) po’o tua (anticlockwise).

E sa le feosoosofa’i.

1. Ta’u mai ni uiga se lua o le upu *tau* i le 1. Samoa 2. Igilisi:

2. Sa’ili ni upu se 5 e faai’u i le fasiupu *ao*

3. Su’e se upu e 9 mata’itusi ma tusi sona fa’amatalaga:



4. Tusi uma upu/ fuiupu e ta’i 3-9 mata’itusi, ma o latou soa i le Igilisi (E faitau ai ma upu ta’ua i le 1, 2 & 3)

Lelei atoa = 12 upu


Lelei tele = 8 upu

Lelei = 6 upu

PASO I GAGANA E LUA

Faatumu i upu/igoa Samoa

Fill crossword with Samoan words/names



©LPSL TAVITA

Faalava ~ Across




- 1 to open a new building or business (6)
- 4 a Samoan address for a talking chief (4)
- 8 A bat’s sound or screech (4)
- 9 Counting: 12 items (6)
- 11 Yawn (6)
- 12 Pronoun that goes with someone’s book (4)
- 14 Clap (po)
- 15 Samoan for Eleanor (6)
- 19 Samoa’s capital (4)
- 22 soap-suds, lather (2)
- 24 sheep (5)
- 27 Wine (5)
- 28 Boat (3)
- 29 tracks in the field (5)
- 30 Samoan for the name Joan or Joanna (5)

Lalo ~ Down

- 1 falling asleep (7)
- 2 Knee; to kneel (7)
- 3 First word in the Lord’s Prayer in Samoan (2)
- 5 Request (5)
- 6 to send out (5)
- 7 Weather (3)
- 10 Name: a Samoan village (4)
- 12 Adverb: At once, now (3)
- 13 In case, lest (3)
- 16 this (3)
- 17 Only (3)
- 18 Clouds (2)
- 20 Pint (5)
- 21 pathway, method (5)
- 23 be present (4)
- 24 chicken (3)
- 25 come first in race (3)
- 26 Samoan for Eve (3)

SU’ESU’EGA: FA’ASOA LE ATA O LE MANU MA LONA IGOA

1. LUPE
2. SEGA
3. MANUMEA
4. ATAFU
5. TOLOA
6. FUIA



Galuega fa’aopoopo:

1. E iai ni aoga o nei manu i tagata/ ma le si’osi’omaga?
2. E iai ni upu/solo/pese a Samoa e fai i ai?
3. O a ni faailoga e tulagaese ai?
4. O a o latou igoa faa-Peretania? (Fesili i ou matua pe a e le iloa le tali)



SUDOKU: Faatonuga:

Fa’atumu pusa numeru (tama’i sikuea) i fuainumera 1 i le 9. Ia uma ane le galuega ua maua atulaina ta’itasi (tu, fa’alava) o iai le 1 i le 9. E tofuu le atulaina ma lona fa’atulagaga e ese mai le isi.

SUDOKU ~ TAALOGA I NUMERA (sudoku.com)



TA'ALOGA FOU ATIA'E AI TOMAI I GAGANA E LUA:

Ta'aloga fou mo tamaiti

PI the Speller

- Rules:
1. Build as many English words as possible, start with three letter words.
 2. Every word you build must include the Alpha Letter (centre).
 3. Each letter is used only once, including the Alpha Letter.
 4. The class as individuals or groups can play this game. 1 point for each four letter word, 2 for each five letter word, 3 for each six letter word or more

Three letter words _____

Four letter words _____

Five letter words _____

Six/seven letter words _____

O le Paso Numera

Fa'atumu avanoa i fuainumera e fetai tonu ma le faatulagaga o le paso atoa. Taga'i i faata'ita'iga na ua avatu.

| 3 DIGITS | | 4 DIGITS | | 5 DIGITS | | 6 DIGITS |
|----------|-----|----------|------|----------|-------|----------|
| 182 | 620 | 2598 | 7481 | 23471 | 46128 | 152694 |
| 308 | 621 | 2965 | 7615 | 24963 | 52733 | 160952 |
| 374 | 729 | 3299 | 8945 | 25974 | 53875 | 347316 |
| 455 | 766 | 5071 | 9278 | 27048 | 84130 | 827438 |
| 482 | 824 | 5479 | 9420 | 32471 | 87526 | 914752 |
| 493 | 906 | 6391 | | 34623 | 93428 | |
| 507 | | | | | | |

Courtesy salamander.com

ATA : TAUPOU ~ ALEX MATE TUA'OI



TUSIATA: ALEX MATE TUA'OI. O le tele o ana galuega e 'auga lava i ata o tagata, manu, ma mea ta'itasi. E pei o ata o alii lakapi ta'uta'ua e iai Tana Umaga, Jonah Lomu ma isi. I le ata o i luga se taupou Samoa e te ono vaai i ai i se faamalama o se falesa. E le'i a'oga Alex i se a'oga tusiata a o lona lava sogasoga ma le to'aga.

SOLO ~ LEVI TAVITA

Fuga

O italia i fafo o lo matou faitoto'a ua leva le faafiafialoto talu le te'i mai o le taututupu, ma fofola le fala felanua'i a le taumafanafana; o i latou e faafeiloa'ia a matou malo asiiasi a o lei ulufale; e ifoifo mai pei ni Sapani fa'aaloalo. Konnichiwa!

Ua leva lo latou matea o le tupua: o se fale tuai ma faaleiloga lenei; ua naunau e fa'aatoa i so latou malosi le mau ava e fia faatumu—samasama o se lanu e ata mamao; poo lea ua saga lauusi ai ma lapopo'a o latou fuga, ma so'ona tulolo foi lo latou ava ma le migao;

(O la'u tala musumusu lenei: E vaivai o latou 'au, e le pei o la auro e tolu i le fagu a Vincent poo fa'i fua sesega i laufanua sa ou masani ai)

Ua to'ulu isi i se savili malosi na agi e lei mamao, toe ai na o le tasi lenei. Na ou fesoasoani e taute'e i luga.

E iai le tufuga na vali sana ata i lili o le vao ma tautau a'e faaleiloga i le va o le lagi ma ao - i luga o se te'e la'au: Ma na suia lo tatou oge manatunatu.

Fuga! e te le iloa lo'u fiafia i lou tulata mai.



TALA O LE TAUMALULU MO TAMAITI: TUSIA LPSL TAVITA

O alii ti'eti'e o le po

NA uma lava le faaiipoipoga a lo'u tamā ma lo'u tina ma o ai loa ma nonofo i le togāvao.

Na fau lo la faleo'o, ma o le fale fo'i lena na ou fanau ai. Na o le togavao lava na ou iloa e a'u ma nai o'u tei laiti e to'alua, o lo'u uso ma lo ma tuafafine laitiiti. E seāseā matou o i le aai. O lo'u tamāmatua e fai ma asiasi mai.

E tasi a le faleoloa i le nuu, o lena i le aai. A fai sa matou faatau, o lo'u tamā e alu i le matou solofanua e fai mai.

Alu a'i ua mate la matou solofanua, ae toe ai na o lana tama. O lea na tausavali ai lo'u tamā e fai a matou faatau.

Se'ia oo i le tasi aso na ma'i ai lo'u tamā. Ua valu o'u tausaga i le taimi lena. Faato'a manatua e lo'u tina ua uma le matou suka a ua vave ifo le pogisa. E fia aumai fo'i ni lautii mai le ti a le pulenuu e fofō ai le ulu o lo'u tamā.

Ua lagona le tagi a alise. O taimi ia, fai mai ai lo'u tamāmatua, e tatau ona faofale ai tagata uma. O le taimi e tapua'i ai. E leai se tasi e tatau ona toe fealua'i i fafo. O taimi ia e feoa'i ai aitu. O a'u le isi ou te le fefevale gofie i ni tala. A o lenei ua lagona sina popole, auā o le taimi muamua lenei o le a ou tofotofoina ai le sa'o o le upu a lo'u tamāmatua.

Na ou iloa i lana pupula e le i mana'o lo'u tamā ou te alu na o a'u, a ua le mafai lo'u tina. E tatau ona aumai ni lautii e fofō ai lo'u tamā ua malosii lona fiva.

Ua amata ona malosii le fetagisi fetalii mai o manu o le tauafiafi, ma le pogisa ua totō ifo. Ua lagona lo'u fefevale. Ae le mafai ona ou fai atu i lo'u tina, e leai. O a'u o le ulumatua, ma o loo faalagolago mai o ia ia te a'u.

Ou te le i toe faatali a ua ou alu loa i le atoa. E tatau ona ou faatelevave manū e le i pogisa le auala ona faigata lea. E o'o mai i lea taimi ua ou faalogologo so'o i fagogo a lo'u tina e fai i saualii. Lenei e foliga ua feala uma mai na saualii i o'u mafaufauga. E foliga o loo taufetuli mai i o'u tua.

Pe tusa ma se 'afa le mamao o la'u momo'e ae ou faalogoina loa le feolo mai o lupe. Ou te fiafia i lupe ma a latou tagi, fai mai lo'u tamāmatua o lupe e faapei o ni agelu e leoleoina tagata. Ou te tu loa i luma o le faleoloa ae uma loa ma le fetagisi a lupe.

Na tilotilo mai le faatauolua ma faapea mai lana tala, "O lou tamā fo'i Lole? A o le a le mea ua tuli mai ai na o oe? Ailoga e te iloa o taimi nei e feoa'i ai aitu?"

Na 'ata le tamaloa lapo'a e peisea'i e taufaalili. Na ou ta'uina i ai le ma'i o lo'u tamā ona faapea mai lea, "Avatu fuala'au



ia e inu ma lou tamā. Aua e te toe alu i le fale o le pulenuu e mamao i lugā. Ua tatau ona e toe fo'i."

Na ou faafetai i le faatauolua ma ou toe liliu loa e sauni e amata le isi tamo'ega. Na maua e o'u si'umata le li'o o le masina faalao ua aliali a'e, faapei o se saualii lapotopoto ua te'i a'e, o loo tilotilo ifo mai lona tuugamau pa'epa'e.

Ua tata vale lo'u fatu ma e le i pine ae patapatatū le auala i la'u momo'e. E le i leva ona ou momo'e ae ou faalogoina loa le leo e sili ona ou pala'ai ai, o le uisa a le lulu. Pei lava ua tutui lo'u tua e se isi i se naifi 'aisa ma'ai malulu i lea taimi. Na ou tu faafuase'i e pei o se iniseti ua taia ma pi'i mau i se upega o se apogaleveleve.

O se taimi muamua lea ua ou lagona ai lo'u fefevale tele. Na ou faapea, atonu o le pa'ō o la'u momo'e ua mafua ai le tagi a le lulu, ona ou la'ala'a lemu lea. Ae leai, ua atili ai ona faatetele, e foliga ua fetagisi uma ai ma isi manu o le vao, ma ua pei ai ua aitua atoa le togavao i la'u faalogo.

Na noga tagi a le lulu ma manu, a o le taimi lea ua ou le iloa le auala. Ua matuā pogisa lava le togavao, na o o'u vae o loo su'ea le auala i luma a ua le mafai e o'u mata ona toe iloa se mea ona o le malosii o le pogisa. Vagana sina malamalama mai ave o le masina i o'u tua, a o le faalavelave, o loo ufitia le malamalama e uluulu mafiafia ma pogisa o la'au o le vaomatua.

Ua ou le iloa le mea e fai, ae faafuase'i lava ona ou lagonaina se isi pa'ō e sau mai o'u tua. Na ou liliu vave ma ou vaaia ni ataata o ni tagata i le masina o loo aga'i mai i luga o ni solofanua. E to'atolu. O ai nei tagata?

E leai se taimi e tali ai lea fesili auā na vave ona o'o mai i latou i le mea o loo ou tu ai. Na tutu nei solofanua i o'u 'autafa. Ua ou iloa teisi atu o latou fuaitino i le ataata o le masina ma le mumu o se molimatagi o loo 'u'u e le tasi o i latou. "O fea na e alu i ai," o le leo paū lea o le tagata o loo nofo mai luga ma tautala mai, ou te le iloa atu ona foliga. Na ou ta'uina atu i ai, ona faapea mai lea o

le tagata, "Oso mai i luga tatou o. Tu'u mai lou lima," e fai mai lava le upu ma aapa mai lona lima i lo'u lima ma toso atu a'u i luga.

Na mou malie ese so'u lagona popole ina ua fa'auau la matou malaga. Ua ou nofo nei i tua o le tagata ou te le iloa poo ai. E leai lava se tala na toe fai mai ai le tagata lea o loo ma ti'eti'e. E leai fo'i ni tala na faia a i latou i lea taimi a o alu la matou ti'eti'ega i uta, e aga'i i lo matou fale.

A o alu la matou ti'eti'ega na ou matauina ni mea uiga ese. E foliga e aga'i mai i tua se matagi o loo tuleiina i matou i luma faatasi ma solofanua. Sa ou faapea, e tatau ona fetai'a'i o matou mata ma le matagi ae leai.

O le isi mea na oso ai lo'u masalosalo o le le lagona o se pa'ō o vae o solofanua. E peisea'i o loo matou felelei ma solofanua i luga o le 'ea. Ae na ou musu e mafaufau i ia mea. Pau le mea o i lo'u mafaufau, o nei tagata o ni tagata moni lava ma lelei, ua latou fesoasoani e momoli a'u i lo matou aiga.

E le i umi lava ae taunuu la matou ti'eti'ega i luma tonu o lo matou lumafale. Ua taofi solofanua ae ou te le iloa pe na faapefea ona tutū. Ona faapea mai lea o le tagata lea sa ma ti'eti'e, "Alu loa."

Na ou oso nei i lalo ma ou liliu e faafetai atu ia i latou. A o le i mamulu atu le upu 'Faafetai' i lo'u gutu, a ua gogolo atu i latou i le pouliuli.

I le taeao e sosoo ai, na faamatala ai e lo'u tamā se tala uiga ese i se 'auuso e to'atolu e faapea na feoti i gauta o le tuasivi i se misa na fai ai. Fai mai o ni seila i latou mai se vaa faomea na sosola ese mai, ma nonofo ai i le tuasivi. E ta'ifitu tausaga ma iloa i latou, i le po e faalao ai le masina.


Talu mai lena po, e masani ona ou mafaufau faapea, afai e maua se avanoa matou te toe ti'eti'e ai faatasi mai i latou, ou te mana'o ou te ti'eti'e i la'u lava solofanua. Ou te fia fesili fo'i i ai poo fea e o mai ai.

O le 15 lenei o o'u tausaga ua ou tusia ai lenei tala. Ua iai la'u lava solofanua ou te ti'eti'e ai. O le po nanei e fa'alao ai le masina.



~ TAALOGA PASO SAMOA I LE GAGANA SAMOA ~ POTO LAUTELE ~

1. Faatumu le pusa i upu/igoa Samoa poo se tasi e faatonuina.
2. E lua faailoga ta'i \$100 mo se to'alua muamua e mafai ona la faatumuina le paso i lona sa'o atoatoa.
3. E leai se tasi na maua le faatulagaga sa'o o le paso lona 5.



Copyright LPSL Tavita 2023

FAALAVA ~ ACROSS

- | | | |
|---|---|--|
| <ol style="list-style-type: none"> 1. O le a le autu o le pese e i ai upu nei 'le tumutumu oe o nai o'u mafaufauga'? (6) 4. Nu'u sa nofo ai Nafanua (9) 8. Maua le avanoa e fai ai (5) 13. Aganuu: Aiga paia (10) | <ol style="list-style-type: none"> 16. Fai ifo i lalo le numera poo le malosi (10) 18. O se suafa matai i Asau (3) 19. Niu ua uma le mamata (6) 20. Omia le lima i le vailaupapa (4) 21. Faauma igoa 'aufaipese: Tapu _ Trio (6) | <ol style="list-style-type: none"> 22. e 'u'u ai le ipu (2) 24. Igoa o se aufaipese e ana le pese Elegi (3) 27. Tulafono Tusi Paia: O le a e fai e fanau i matua?(3) 28. Faitauga: motu e tele (3) 29. o se laau toto e aiga ma le talo (5) |
|---|---|--|

PASO SAMOA MAUA LE TAU

- 30. O lona 'alavalava e fa'aaoga i le 'ava (3)
- 32. lafoa'i (se isi upu) (4)
- 35. Suinauna: to'alua tagata (2)
- 36. Kalama: fasiupu e fau ai nauna (2)
- 37. sasao mai i le tino le vevela (3)
- 38. Upu o lauga e faamatafi:
Ni _ auā lau susuga ma le malaga (2,6)
- 39. mamao o le tasi nuu ma le isi (2)
- 40. matai faiupu o nuu (4)
- 42. Igoa o se faletalimalo i Savaii:
_ Resort (4)
- 44. Upu: E ta le ā ae popo'e? (3)
- 46. Apu Samoa (2)
- 47. Faaleo le maualuga o le pese (2)
- 48. Se alalafaga tuuta o Falealili (3)
- 49. le mea e fai i le falamoe i le taeao (4)
- 50. alii ta'i o nuu/itumalo (6)
- 54. suafa e iloa ai se aiga (5)
- 57. Ta'u faapuupuu o le ave a'e (4)
- 58. upu e fai atu i se 'au ua malo (7)
- 59. pito ma'ai o se tao (6)
- 62. Tusi Paia: ulua'i tagata (5)
- 63. Aupaese afua mai Vailele (10)
- 64. o se 'ula Samoa (3,3)
- 66. o se tautua e lave mai i puapuaga (7)
- 67. maopopo i le agaga e tasi (5)
- 70. 'aua ne'i galo (7)
- 71. Fagogo: Tala ia Vi ma _ ma le la tama o Sinausuimanu (2)

- 73. Aso lona tolu vaiaso (3)
- 75. malosi le amio, faigata ona gagau (2)
- 77. taaloga fa'aaoga ai na o vae (4)
- 78. e alu ai le asu i fafo (7)
- 81. Upu faalalolalo:
E _ malu i pu'ega pe afai ua sala se gagana (3,3,3)
- 83. Atonu (se isi upu) (2)
- 86. Tama na fatitu ai le launiu (4)
- 88. Anava tauave a le Kolisi o Samoa (6,1,6,2,5)
- 90. Pese: Alo ia lau _ tofaina oe (3)
- 91. Igoa o se tusi: Sasa'a le _ (5)
- 92. O se alii pese Samoa e suafa i se fa'i Samoa (8)
- 93. O se fatupese Samoa ua maliu:
_ Siō (4)
LALO ~ DOWN
- 1. Sauniga paia lotu Katoliko (6)
- 2. Suafa o se alalafaga i Falealili (10)
- 3. Masina 11 kalena (6)
- 4. Upu: Uo uo _ (3)
- 5. Se iniseti to'aga (3)
- 6. Sosaiete: O le lautele o le nuu (6)
- 7. Faiā ma se tasi (7)
- 9. Pese: Le _ Samoa matala mai le aso laofie (4)
- 10. Polokalame soifua maloloina: Aiga _ (9)
- 11. Igoa o se tusi Tupua Tamasese faaaoga i a'oga (4,6)

- 12. A'oga: o se pepa o ata ma faamatalaga (5)
- 14. Upu amata ai le Tatalo a le Alii (2)
- 15. Masina 9 kalena (6)
- 17. Meaola e fono ma ona vae (3)
- 23. momoli se tagata malaga (5)
- 25. manu e nofo i tuafale (3)
- 26. Alalafaga o Li'o ma Tu'u'u (5)
- 30. Piliati: pe a soli tulafono (3)
- 31. o se pa'a e fia sili (3)
- 33. galuega a se tulafale i le sa'o (6,3)
- 34. taliaina se mataupu e le fono (5)
- 35. Upu: O Samoa e le o se atunuu _ (7)
- 40. Taunuu le vaa ma lafo le taula (4)
- 41. Talatuu: momoli _ o malo (8)
- 43. Faipule tamaitai Samoa na mua'i tofia sui fofoga fetalai (8)
- 45. Faafilemu (se isi upu) (9)
- 46. O se matai i Upolu ma Savaii (3)
- 51. Vaega o se vaaalo Samoa (2)
- 52. auai i mea fai a le nuu (6)
- 53. Mautu (se isi upu) (5)
- 54. Se isi igoa o le pu e ili ai le sa (6)
- 55. igoa o se alalafaga tulata i Apia, iai se pese e fatu i ai (9)
- 56. ulugalii a ni manu (9)
- 60. igoa o se vao tupu maualuga (4)
- 61. vaega pito i luga o se laau (10)
- 65. A'oga Faafaifeau Piula: Faalupega o le ta'ita'i (peresitene) o le a'oga (8)
- 68. Suinauna faamama'i: O ai _ tama? (3)
- 69. Tuli le ta'ifau (3)
- 70. O se faailoga vaaia e faamanatu i se mea na tupu poo se tagata ua maliu (3)
- 72. O se tasi vaega taua o teuga a se taupou poo se manaia (5)
- 74. O pulu niu ua mago faala, fai ai faata'a (6)
- 76. kiki (se isi upu) (2)
- 79. igoa o se manulele lapo'a fagota i le gataifale (5)
- 80. 'Autalo a Magiagi: Lupe o le _ (5)
- 82. Toe manatunatu i se tasi sa mafuta a o soifua poo taimi o le olaga ua sola (5)
- 84. Aganuu tausii: _ le va (3)
- 85. Tusi Paia: O le Alii o le _ ia o lo'u olataga (4)
- 86. Pese: Sa tumu o le motu o tagata, Ina ua _ mai le alaga (2)
- 87. e tupu pe a apili se ivi i'a i le faa'i (4)
- 89. igoa o se laau fua manogi Samoa (3)

TALI O LE PASO 6 SI'OSI'OMAGA (E LEAI SE TASI NA TALIINA ATOATOA LE PASO)

| | | | | | | | | | | | | | | | | | | | | | | |
|---|---|---|---|---|---|---|---|---|---|---|---|---|---|---|---|---|---|---|---|---|---|---|
| T | O | F | A | F | A | | M | A | T | A | E | L | I | G | A | | S | A | L | E | S | A |
| A | | A | | O | | | A | | O | | | A | | A | | P | | L | | L | | O |
| P | U | A | T | A | U | N | O | F | O | | F | A | A | F | A | I | G | O | F | I | E | |
| A | | L | | F | | O | | O | | P | | L | | O | | A | | A | | A | | F |
| S | I | A | P | O | A | N | A | M | U | A | | A | L | A | U | N | I | | A | P | O | A |
| A | | U | | A | | U | | E | | A | V | A | | G | | O | | S | | A | | N |
| | A | T | U | G | A | | A | N | O | | A | | F | A | A | | T | I | A | | T | O |
| T | | E | | A | | U | | I | | T | A | | A | | I | A | | U | | F | | L |
| I | U | L | I | | E | L | I | | V | A | | T | O | F | A | | A | M | O | A | M | O |
| V | | E | | S | | I | | F | | F | E | O | | A | | F | | U | | A | | A |
| O | O | | S | I | U | | T | A | A | I | | T | U | A | V | A | O | | | T | U | |
| L | | U | | O | | M | | I | | | A | O | | S | | A | | F | U | A | | F |
| I | N | A | I | | T | A | U | M | A | T | E | | T | A | U | M | U | A | | M | | A |
| | | F | | T | | U | | A | | A | | L | | N | | O | | A | T | A | F | A |
| F | A | A | M | A | U | S | I | L | I | | T | U | L | I | P | E | | V | | S | | M |
| O | | T | | I | | A | | A | | S | | | U | | | M | O | A | T | O | G | A |
| T | A | O | F | I | A | | A | G | A | A | L | I | I | | A | O | | E | | A | | S |
| U | | | I | | L | | A | | M | | T | | A | | E | A | | U | L | U | I | |
| | F | A | A | T | U | M | U | | N | A | F | A | N | U | A | | A | I | | I | | N |
| A | | U | | E | | A | | S | | S | | U | | V | | L | | A | L | I | L | O |
| F | O | L | A | U | M | A | L | E | F | A | A | T | U | A | T | U | A | | O | | A | |
| A | | I | | G | | U | | G | | M | | A | | S | | K | | M | A | F | O | E |
| | F | A | R | A | O | | L | I | G | A | L | I | G | A | | A | U | | U | | A | |

A'OGA SAMOA ONLINE

SAMOA ONLINE SCHOOL

O e sa'ilia se tautua
e fesoasoani i le a'oga
a lou alo poo oe fo'i?



SALĀ DR SAILI AUKUSO

MATOU TE OFOINA TAUTUA NEI:

- E lagolago fanau i le atina'e o tomai faavae i le tautala, faitau, tusitusi, malamalama i le gagana Samoa ma le gagana Peretania
- E fesoasoani i soo se tasi o loo fia faalelei ona tomai faavae literasi i gagana e lua
- E fesoasoani i meaa'oga a fanau i le fale pe a tu'ua le a'oga
- E lagolago soo se tasi i le tapenaga o ni pepa mo a'oga, sauni atu i su'ega poo ni fonotaga
- E lagolago polokalame a'oga i mataupu taugagana e lua, ma le silapasi a'oga Samoa—Niu Sila ma Samoa
- E fesoasoani i le atina'e o agavaa ma tomai mana'omia o tusitusiga ma su'esu'ega i le kolisi ma le iunivesite fo'i
- Ma ni isi fo'i ofo lelei mo oe

Fesoota'i mai loa i le

Telefoni: numera 02102567412; 0210364322

Meli: ola.aogasamoasonline.com; saili.niupac@gmail.com

Poo le Upega Tafa'ilagi: **A'oga Samoa Online**

Tulimanu o Pola:



E muamua la'u faafetai i le Tamā i le lagi i lou soifua ma so'u malosi ua tatou toe fesilafa'i ai i lenei foi taeao manino. Malo le soifua maua.

E amata se motuga'afa i le faalavelave lea na mu ai si pepe 15 masina i le iputi vevela. Talofa e i si 'alu'alutoto, ae lagona foi le alofa i le tausitama. Afai o se taimi muamua lea ua 'ela ai le faatautu, o lena, o loo mafatia foi ia e pei o le pepe i le falema'i. Ua tatau ona tapena se manual o mea e tausisia i totonu o potua'oga ma so'o se ofaga e tausi ai tamaiti. Ni tulafono se sefulu. Muamua lava le 'Aua ne'i avatua ni iputi vevela i potua'oga, o loo iai le Staff Room e aga'i i ai.

Sa ou matamata i le polokalame a le alii lea o Paddy Gower i le TV. O lana mau, ua tatau ona fua se tapula'a o le tua'oi e o'o i ai le pule a le telefoni feavea'i. Mea moni lava ua leai se vaipanoa e le o'o i ai lana pule, i itula o le aso, o le po, le vaeluapo, i potu o le fale, luga o le auala taavale, fale faigaluega, a'oga e o'o lava i taimi a o fai le lotu. Moni o le aia tatau a le tagata, ae a aunoa loa se sosaiete ma ni tapu, ona vaaia lea o nisi foliga e le fia vaai i ai. E iai la le amio faasaua lea ua sasao a'e e fa'aaoga ai le telefoni. Moni e le o le telefoni, ae o tapu e faatonutonu ai le sologa lelei o le olaga i se malo poo se nuu.

I nisi atunuu ua faama'ite le malo i le faia o ni suiga i le mataupu sa ta'ua. Ua pasia ai tulafono e vaoia ai le toe avatua o telefoni e fanau i potua'oga. E le iloagata le pogai, aemaise ua iloa le sootaga ma ausiga manuia a le fanau. O loo ta'imua pea Ausetalia ia Niu Sila i nei suiga. I New South Wales, e amata i e kuata lona fa ona faasā le telefoni i kolisi uma a le setete. Talitonu fo'i o le auala lena i luma pe a fia vaai i ni suiga mata'ina. Pei a o le upu a Gandhi, avea oe ma lena suiga e te fia vaai i ai i lou nuu ma lou si'osi'omaga.

O galuega e faamoemoe i ai le tausiga o aiga, ae a faalala mai loa le 'faamalolo' ona nofo lea ma le popole. E iai nai uso ma tuafafine o loo galulue i iunivesite e lima a Niu Sila. Ona ua osaosa le 'ato tupe a pulega o lea ua ava'e ai fo'i i luga le togafiti maneta masani, faamalolo nisi o le aufaigaluega. O le fesili, o le a se faiga e fo'ia ai lenei mea o loo tupu so'o, aafia ai le 'aufaigaluega ma o latou aiga?

O le tali a se tasi faia'oga, ua tatau ona tilotilo le malo i le faamalolo o se iunivesite se tasi pe lua fo'i. Ona lava lea o le faasoa a le malo i se 6 pe 7. Ae ia te a'u lava ia, o lenei faaletonu e mafua i le atagalua o loo mulimuli ai, i le faatautavā pei ni pisinisi ae le pei o ni a'oga. Lea la ua omia ai pulega ae mafua i le sese o le ata o le fale. Ae o nai motuga manatu na faatupu manatu. Se upu ua sala toe faafo'i mai. Manuia.

NIUPAC PUBLICATION

Email: ola-niupac@gmail.com
Phone: 02102567412
Facebook: [ola—puletini—a'oga](https://www.facebook.com/ola-puletini-a-oga)
Website: www.ola888.com

Editor:
Levi Tavita ~ ltavita8@gmail.com

All rights reserved. This bulletin and its content is protected by copyright laws of New Zealand and international conventions. Except for educational purposes, any other activity pertaining to its use is prohibited. OLA acknowledges and defends the rights of other copyright holders whose material we borrow and acknowledge accordingly.

NIUPAC 2011